

**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ
ԿԱԹՈՂԻԿՈՍԻ ՊԱՏԳԱՄԸ ՍՈՒՐԲ ԾՆՆԴԵԱՆ ԵՒ
ԱՍՏՈՒԱԾՅԱՅՏՆՈՒԹԵԱՆ ՏՕՆԻ ԱՌԻԹՈՎ**

Յանուն Հօր եւ Որդւոյ եւ Հոգւոյն Սրբոյ. ամէն:

«Ես եմ ճանապարհն եւ ճշմարտութիւն եւ կեանք»
(Յովհ. ԺԴ. 6):

Սիրելի հաւատաւոր ժողովուրդ ի Հայրենիս, Արցախ եւ ի Սփիւռս.

Քրիստոսի՝ մեր Տիրոջ Սուրբ Ծննդեան բերկրանքով այսօր մեր ցնձագին գոհաբանութիւնն ենք բարձրացնում առ Աստուած: Փառաբանում ենք մեր Փրկչին՝ Բերթեհեմում ծնուած մանուկ Յիսուսին: Սուրբ Ծննդեան օրհնեալ օրը երկիրը երկինք դարձաւ, եւ նրանում ծագեց Արդարութեան արեգակը՝ ճշմարտութեան լոյսով լուսաւորելու համար մարդկային հոգիները, որպէսզի ճանաչեն, տեսնեն ու գտնեն իրենց փրկութիւնը:

Աստուծոյ Որդին խոնարհուեց երկնային բարձունքներից, մարդացաւ ու աշխարհ եկաւ՝ բանասերկոյի խաբէութեամբ դրախտից վտարուած մարդուն ազատելու մեղքից եւ մեղք սերմանող սատանայի իշխանութիւնից: Եկաւ, պատուիրանազանցութեամբ Աստուծոյ դէմ ելած նախաստեղծ մարդու կորուսեալ սերունդներին վերստին երկնքի արքայութիւն վերադարձնելու եւ Աստուծոյ որդեգիրները դարձնելու: «Յոյց տուր ինձ ճանապարհն այն, որով պիտի գնամ, քանզի դէպի քեզ, Տէր, բարձրացրի հոգիս» (Մաղմ. ՃԽԲ. 8), ի պատասխան մարդկութեան այս աղերսի, որ Սաղմոսերգոյի շուրթերով երկինք էր բարձրանում՝ հնչեց մեր Փրկչի ձայնը. «Ես եմ ճանապարհը եւ ճշմարտութիւնը եւ կեանքը»:

Ճշմարտութիւնը եւ կեանքը Իր անձի հետ նոյնացնելով՝ մեր Տէրը ճշմարտութիւնը հաւասար արժէք հռչակեց կեանքին: Նա ճշմարտութեան ճառագայթներով ցրեց մարդկային մոլորութիւնների ու մեղսագործութիւնների խաւարը եւ պարգեւեց մարդկանց ճշմարտութեան Սուրբ Հոգին (Յովհ. ԺԴ. 17), որպէսզի մարդկութեան ընթացքը հաստատուի խաղաղութեան ու արդարութեան, միմեանց հանդէպ սիրոյ եւ ազնւութեան վրայ հիմնուած կեանքի մէջ:

Տիրոջ փրկագործութեամբ պարտութիւն կրած չարն այսօր էլ մոլեգնութեամբ պատերազմում է մարդկային հոգիների համար, փորձելով մշուշով

պատել Քրիստոսի բերած ճշմարտության լոյսը, որպեսզի մարդիկ չտեսնեն դէպի երկինք տանող ճանապարհը եւ խաբէութեան որոգայթներում մոլորուելով՝ զրկուեն երկնային արքայութեան յաիտենական կեանքից: Չարը դադար չունի, գործում է օրնիբուն եւ գործում է մարդկանց միջոցով: Չարը ճանապարհ է հարթում, երբ կեանքում պակասում է նախանձախնդրութիւնը ճշմարտության հանդէպ, եւ սուտը գտնում է իր համակիրներին: Չարի խաբէպատիր ընթացքները զօրանում են, երբ մարդը հեռանում է Քրիստոսի ուսուցանած սկզբունքներից՝ կեանքը լցնելով կեղծիքներով ու խեղաթիւրումներով: Այսպէս է, որ իրողութիւնների ներկայացումը ձեւափոխում է բանասարկութեան եւ անճիշտ գնահատականների, կրօնի ընկալման մէջ կամայական ու շահախնդիր մեկնաբանութիւնները ծնունդ են տալիս աղանդների, մարդու իրաւունքի պաշտպանութեան պահանջով պարտադրում են երբեմն նաեւ հասարակութեան մտածելակերպին ու արժեհամակարգին անյարիր բարքեր: Այսպէս է, որ աշխարհում բարոյականութիւնը տեղի է տալիս ապաբարոյականութեան առջեւ, խօսքի ազատութիւնը վերածում է խօսքի սանձարձակութեան, վկայութիւնը՝ ճշմարտութեան խեղումի: Ընդհանրութիւնը նենգափոխելով՝ քաղաքական շահերը յաճախ հակադրում են արդարութեանն ու խաղաղութեանը, նիւթականի մոլուցքը, եսակենտրոն ձգտումները՝ գլխութեանն ու մարդասիրութեանը՝ աշխարհում բազմացնելով հակամարտութիւնները, վիշտը, կարիքն ու նեղութիւնները:

Կեանքն ալեկոծող այսպիսի իրողութիւններից աշխարհը կձերբազատուի, երբ մարդիկ ընդունեն Քրիստոսի ճշմարտութիւնը, երբ իրենց հաւատաւոր գործերով վկայեն Տիրոջ ներկայութիւնը եւ առաքեալի պէս բարձրաձայնեն. «Իմ մէջ կայ Քրիստոսի ճշմարտութիւնը» (Բ. Կորնթ. ԺԱ. 10): Ընդհանրութիւնը կրելով միայն մարդկութիւնը կարող է ապահովել կեանքի առաջընթաց, բարեփոխում, բարի արդիւնք ու զարգացում, քանզի ոչինչ մնալուն չի կառուցում խաբէութեան վրայ՝ ոչ մարդկային յարաբերութիւններ, ոչ բարուրդ հասարակական կեանք ու պետականութիւն: Երբ ճշմարտութիւնը մարդկանց մէջ չէ, արժեզուրկ են նուիրում, արդարութիւն, եղբայրսիրութիւն, բայց ճշմարտութեամբ առնում են զօրութիւն եւ գործի վերածուելու ուժականութիւն:

Մեր իրականութեան մէջ, սիրելի բարեպաշտ ժողովուրդ, նոյնպէս, ցաւօք, տեղ են գտնում վատաբանութիւնն ու բանասարկութիւնը, անտարբերութիւնը երկրի ընդհանուր բարիքի նկատմամբ: Նահանջ են ապրում ընտանեկան աւանդական արժէքները, դժուարութիւնների առջեւ՝ յանձնառութեան ոգին: Պատասխանատւութիւնը ստորադասում է իրաւունքին, անզուսպ պահուածքն ու վիրաւորանքը ընկալում է որպէս քաջութիւն: Մեփական կար-



Ս. Ծննդյան եւ Ասրվածիպարկունւթյան Ս. Պարարագի ժամանակ



Տրոփիկ

ծիքն արտայայտելու իրաւունքը յաճախ ի չարս է գործադրում ճշմարտութիւնն աղաւաղելու, կողմնակալ տեսակէտներ տարածելու համար: Այսպիսի մտայնութեանց մէջ սուտը քողարկում է ճշմարտութեան դիմակով, բանավէճը դառնում է վիճաբանութիւն, քննարկումը վերածւում քամահրանքի ու դատապարտութեան խօսքի, որոնցից հեռանում է Աստուծոյ ճշմարտութեան Հոգին, Աստուծոյ իմաստութիւնը, եւ մենք դժուարանում ենք, այո՛, նոյնիսկ դադարում ենք տեսնել բարին, արդարը, ու մեր կեանքում տկարանում են միմեանց հանդէպ հաւատն ու վստահութիւնը եւ գալիքի յոյսն ու լաւատեսութիւնը:

Բեթղէհեմում ծնուած Մանուկն է, սիրելի հաւատաւոր ժողովուրդ, ճանապարհը, ճշմարտութիւնը եւ կեանքը: Նրան պիտի ապաւինենք, մեր սրտերում Նրա ճշմարտութիւնը կրենք, որ վերափոխուի մեր կեանքը, լցուի աներկիւղ վստահութեամբ, դժուարութիւնները յաղթահարելու եւ ամէն բան Աստուծոյ բարերար կամքով ուղղելու գործեամբ: Ճշմարտութիւնն ազատարար է: «Եւ կճանաչէք ճշմարտութիւնը, եւ ճշմարտութիւնը կ'ազատի ձեզ» (Յովհ. Ը. 32),- ասում է մեր Տէրը: Ապրենք ու գործենք Քրիստոսի ճշմարտութեամբ, Նրա խօսքն ու պատգամները դարձնենք մեր կեանքի խաւարացիւր լոյսը, մեր հանդէպ Նրա սէրն ու ողորմութիւնը՝ մեզ միաւորող ուժը, ազգի միասնութիւնը կերտող գործութիւնը: Անխախտ ու ամուր պահենք մեր միաբանութիւնը, համերաշխութեան ոգին, խնամք տանենք եւ հոգանք միմեանց համար, մեր երկրի, հոգեւոր եւ ազգային մեր կեանքի վերելքի համար: Միմիայն այսպէս պիտի կերտենք շէն ու բարօր մեր Հայրենիքը: Միայն այսպէս կարող պիտի լինենք Հայոց Յեղասպանութեան 100-ամեայ տարելիցը դարձնել մեր արդար դատի յաղթանակի հանգրուան եւ բարուրք, արդար լուծման առաջնորդել արցախեան հիմնախնդիրը: Այսպէս կենսունակ պիտի պահենք Սփիւռքը, յոյս ու ապաւէն դառնանք եւ նեցուկ լինենք հակամարտութեան դժուարութիւնները կրող սիրիահայ մեր եղբայրներին ու քոյրերին: Եւ թող մեր բոլոր գործերը Տիրոջով լինեն:

Այս մաղթանքով, Սուրբ Ծննդեան աւետիսով Մեր ողջոյնն ենք յղում Առաքելական մեր Սուրբ Եկեղեցու Նուիրապետական Աթոռների Գահակալներին՝ Ն. Ս. Օ. Տ. Տ. Արամ Ա. Մեծի Տանն Կիլիկիոյ Կաթողիկոսին, Երուսաղէմի Հայոց Պատրիարք Ամենապատիւ Տ. Նուրհան արքեպիսկոպոս Մանուկեանին, Կոստանդնուպոլսի Հայոց Պատրիարք Ամենապատիւ Տ. Մեսրոպ արքեպիսկոպոս Մուրաֆեանին, Հայ Եկեղեցու ուխտապահ ու նուիրեալ ողջ հոգեւոր դասին, մեր քոյր Եկեղեցիների շնորհազարդ հոգեւոր Պետերին:

Հայրապետական օրհնութեամբ եւ Սուրբ Ծննդեան շնորհների հայցով ողջունում ենք Սուրբ Պատարագի արարողութեանը ներկայ Հայաստանի

Հանրապետության Նախագահ տիար Սերժ Սարգսեանին եւ առաջին տիկնոջը: Մեր ողջոյնն ենք յղում Լեռնային Ղարաբաղի Հանրապետության Նախագահ տիար Բակօ Սահակեանին, հայոց պետական աւագանուն, Հայաստանում հաւատարմագրուած դիւանագիտական առաքելութիւնների դեկավարներին, միջազգային կազմակերպութիւնների ներկայացուցիչներին:

Աստուածակառոյց Սուրբ Էջմիածնից, մեր Տիրոջ եւ Փրկչի Իջման Սուրբ Սեղանից Սուրբ Ծննդեան աւետիսով Հայրապետական Մեր սէրն ու օրհնութիւնն ենք բերում ի սփիւռս աշխարհի հաւատաւոր համայն մեր ժողովրդին:

Այս բերկրալի օրը հայցենք, որ Փրկչի Ծննդեան շնորհները մշտասփիւռ լինեն աշխարհում, եւ մարգարէի մատթանքով՝ ճշմարտութիւնը եւ ողորմութիւնը հանդիպեն, արդարութիւնն ու խաղաղութիւնը համբուրուն (Սաղմ. 2Դ. 11):

Թող մեր Տէր Յիսուս Զրիստոսի Ծննդեան լուսազարդեալ շողերը պայծառացնեն մեր Սուրբ Եկեղեցին, մեր Մայր Հայրենիքը, աշխարհասփիւռ հայ կեանքը, որ այն լինի փառաբանութիւն Բարձրեալն Աստծուն եւ պարգեւի ազգիս մշտապէս հոգեւոր անհուն ուրախութիւն, եւ մենք այսօր եւ միշտ խնդութեամբ աւետենք.

**ՔՐԻՍՏՈՍ ԾՆԱԻ ԵՒ ՅԱՅՏՆԵՑԱԻ,
ՁԵՁ ԵՒ ՄԵՁ ՄԵԾ ԱԻԵՏԻՍ:**